

新刊國朝二百家名賢文粹

新刊 國朝二百家名賢文粹卷第八十一

書

上宰相書四

上富丞相書

東坡先生

戰國之進說於人者必其人之有間而可入則其說易行戰國
之人貪天下之士因其貪而說之危國之人懼天下之士因其
懼而說之是故其說易行古之人一說而合至有立談之間而
取公相者未嘗不始於戰國危國何則有間而可入也居今之
世而欲進說於明公之前不得其間而求入焉則亦可謂天下之
至愚無知者矣地方万里而制於一姓極天下之尊而盡天下
之富不可以有加矣而明公為之宰四夷不作兵甲不試是明
公無貪於得而無懼於失也方西戎之熾也狄人乘間以蹙吾
北中國之大不畏而畏明公之一詞是明公之勇冠於天下也
明公居於山東而傾河朔之流人父棄其子夫弃其妻而自歸

於明公者百餘萬明公入而食之旦旦而撫之此百万人者
出於溝壑之中而免於爲野狼之患生得以養其父母而祭
其祖考死得以使其子孫葬埋祭祀不失其故常是明公之仁
及於百世也勇冠於天下而仁及於百世士之生於世如此亦
足矣今也處於至足之勢則是明公無復有所羨慕於天下之
功名也五帝三代之事百家之書莫不盡讀權樂刑政之大小
兵農財賦之盛衰四海之內地里之遠近山川之險易物土之
所宜莫不盡知當世之賢人君子爲夫姦偽險詐之徒莫不盡
究至於曲李小數茫昧惶惶而不可知者皆備其筆而咀其英
泛其流而涉其源雖自謂當世之辯不能傲之以其所不知則
是明公無復有所畏憚於天下之博李也名爲天下之賢人而
貴爲天子之宰無貪於得而無懼於失無羨於功名而無畏於
傳李是其果無間而可入也天下之士果不可以進說也哉也
聞之楚左史倚相曰昔衛武公年九十有五猶日儆儆於國曰

自卿以下至於官師苟在朝者無謂我老耄而舍我朝夕以交
戒我猶以爲未也而作詩以自戒其詩曰抑抑威儀惟德之隅
夫脩武公惟居於至足而日以爲不足故其沒也謚之曰睿聖
武公嗟夫明公豈以其至足而無間以拒天下之士則士之進
說者亦何必其間之入哉不然軾將誦其所聞而明公試觀之
夫天下之小人所爲奔走輻湊於大人之門而爲之用者何也
大人得其全小人得其偏大人得其全故能兼受而獨制小人
得其偏是以聚而求合於大人之門古之聖人惟其聚天下之
偏而各收其用以爲非偏則莫肯聚也是故不以其全而責其
偏夫惟全者之不可以多有也故天下之偏者惟全之求今以
其全而責其偏夫彼若能全將亦爲我而已矣又何求焉昔者
夫子廉潔而不爲異衆之行勇敢而不爲過物之操孝而不徇
其親忠而不犯其君凡此者是夫子之全也原憲廉而至於貧
公良孺勇而至於聞管子孝而徇其親子路忠而犯其君凡此

者是數子之偏也夫子居其全而收天下之偏是以若此巍巍
出若夫明公其亦可謂天下之全矣廉而天下不以爲介直而
而天下不以爲訐剛健而不爲強敦厚而不爲弱此明公之所
得之於天而天下之所不可望於明公者也明公居其全天下
效其偏其誰曰不可異時士大夫皆喜爲卓越之行而此亦貴
校悍之才自明公執政而朝廷之間習爲主道而務循於規矩
士之矯飾力行爲異者衆必共笑之夫卓越之行非至行也而
有取於此校悍之才非真才也而有用於天下此古之全人所
以坐而收其功也今天下卓越之行校悍之才卒不敢至公之
公之門懼以其不純而獲罪於門下軾之不肖竊以爲天下之
未大治兵之未振財之未豐天下之有望於明公而未獲者其
或由此也欤昔范公收天下之士不考其素者可用者莫不咸
在雖其狂嫖無行之徒亦自效於下風而范公亦躬爲詭特之
操以震之夫范公之取人者是也其自爲者非也伏惟明公以

天下之全而自居去其短而襲其長以收功於無窮軾也西南之
正夫求斗外之祿而至於京師翰林歐陽公不知其不肖使與於
制舉之末而發其猖狂之論是以軾進說於左右以爲明公必能
容之所進策論五十篇貧不能盡寫而致其半觀其大略幸甚

上曾丞相書

同前

軾聞之將有求於人而其說不誠則難以望其有合矣世之奇
特之士其處也莫不爲異衆之行而其出也莫不爲怪詭之詞
此物引類以搖撼當世理不可化則欲以勢劫之將以術售其
身古之君子有韓子者其爲說曰王公大人不可以無貧賤之
士居其下風而推其後大其聲名而久其傳雖其貴賤之闊絕
而其相頌之急不啻若左右手嗚呼果其用是說也則夫世之
君子所爲老死而不遇者無足怪矣今夫扣之者急則應之者
疑其詞夸則其實必有所不副今吾以爲王公大人不可以一
日而無吾也彼將退而考其實則亦無乃未至於此邪昔者漢

高未嘗畫儒而不失爲明君衛霍未嘗薦士而不失爲賢公卿
吾將以吾之說而彼將以彼之說彼是相拒而不得其歡心故
貴賤之間終不可以合而道終不可以行何者其扣之急而其
詞夸也譬猶千金之璧者不出於肆而願觀者塞其門觀者歎息
而主人無言焉非不能言知言之無加也今也不幸而坐於五
達之衢又吹吹焉自以爲希世之珍過者不顧執其裾而強
觀之則其所嚮者曷知矣王公大人其無意於天下後世者亦
安以求爲也苟其不然則士之過於其前而有動於其目者彼
將蹇蹇疾行而樓取之故凡皇皇汲汲者舉非吾事也昔者嘗
聞明公之風矣以大臣之子孫而取天下之高第才足以過人
而自視倏然常若不足安於小官而樂於恬淡方其在太宰之
中衣繒飯糗若將終身至於德數而不可掩名高而不可抑貴
爲天子之少宰而其自視不加於其舊之錙銖其度量宏達至
於如此此其尤不可以夸詞而急扣者也軾不佞自爲季至今

十有五年以爲凡學之難者難於無私無私之難者難於通萬物之理故不通乎萬物之理雖欲無私不可得也已好則好之已惡則惡之以是自信則惑也是故幽居默處而觀萬物之變盡其自然之理而斷之於中其所不然者雖古之所謂賢人之說有所不取雖以此自信而亦以此自知其不悅於世也故其言語文章未嘗輒至於公相之門今也天子舉直諫之士而兩制過聽謬以其名聞竊以爲與於此者皆有求於吾君吾相者也故亦有獻其文凡十篇而書爲之先惟所裁擇幸甚

上文潞公論推膽書

同前

留守侍中執事當今天下動德俱高爲主上所倚信望實兼隆爲士民所責望受恩三卅宜與社稷同憂皆無如明公者今雖在外事有關於安危而非職之所憂者猶當盡力爭之而況其事關本職而憂及生民者乎竊意明公必已言之而人不知若猶未也則願效其愚願者三司使章惇建言乞權河北京東益

朝廷遣使按視召周革入覲已有成議矣惇之言曰河北與陝西皆為邊防而河北獨不推鹽此祖宗一時之謀恩也載以爲陝西之鹽與京東河北不同解池廣袤不過數十里既不可捐以予民而官亦易以籠取青鹽至自虜中有可禁止之道然猶法存而實不行城門之外公食青鹽今東北循海皆鹽也其欲籠而取之正為淮南兩浙無異載在餘杭時見兩浙之民以犯鹽得罪者一歲至万七千人而莫能止茲民以兵仗護送吏士不敢近者常以數百人爲鹽特不爲他盜故上下通知而不以聞耳東北之人悍於淮浙遠甚且居推剽之藪常甲於他路一旦推鹽則其禍未易以一二數也由此觀之祖宗以來獨不推河北鹽者正事之適宜耳何名爲誤哉且推鹽雖有故事然要以爲非王政也陝西淮浙既未能罷又欲使京東河北隨之此猶患風痺人曰吾左臂既病矣右臂河爲獨完則以酒色使之可乎今議者曰吾之法與淮浙不同淮浙之民所以不免於

私販而竈戶所以不免於私賣者以官之買價賤而賣價貴耳
今吾賤買而賤賣借如每斤官以三錢得之則以四錢出之鹽
商私買於竈戶利其賤耳賤不能減三錢竈戶均爲得三錢也
寧以予官乎將以予私商而犯法乎此必不犯之道也此無異
於兒童之見東海皆鹽也苟民力之所及未有捨而不煎煎而
不賣者也而近歲官錢常若窘迫遇其急時百用橫生以有限
之錢買無窮之鹽竈戶有朝夕薪米之憂而官錢在暮月之後
則其利必歸於私販無疑也食之於鹽非右飢之於五穀也五
穀之乏至於節口并日而况鹽乎故私販法重而官鹽貴則民
之貧而懦者或不食鹽往在浙中見山谷之人有數月食無鹽
者今將推之東北之俗必不如往日之嗜鹹也而望官課之不
虧疎矣且准所官鹽本輕而利重雖有積滯官未病也今以三
錢爲本一錢爲相自祿吏購賞修築教吏之外所獲無幾矣一
有積滯不行官之所喪可勝計哉失民而得財明者不爲况民

財兩失者乎且禍莫大於作始作俑之漸至於用人今兩路未
有益禁也故變之難遣使會議經年而未果自古作事欲速而
不取眾議未有如今日者也然猶持久如此以明作始之難也
今既已權之矣則他日國用不足添價貴責有司以爲熟事行
半紙文書而決矣且明公能必其不添乎非獨明公不能也今
之執政能自必乎苟不可必則兩路之禍自今日始夫東北之
蠶衣被天下蠶不可無蠶而議者輕欲奪之是病天下也明公
可不深哀而速救之歟或者以爲朝廷既有成議矣雖爭之必
不從竊以爲不然乃者手實造簿方赫然行法之際軾嘗論其
不可以告今太原韓公公時在政府莫之行也而手實卒罷民
賴以少安凡今執政所欲必行者責由助役市易保甲而已其
他猶可以庶幾万一或者又以爲明公將老矣若猶有所爭則
其請老也難此又軾之所不識也使明公之言幸而聽屈已少
留以全兩路之民何所不可不幸而不聽是議不中意其於退

也尤易矣願少留意軾一郡守也猶以爲職之所當憂而冒聞於左右明公其得已乎干瀆威重俯伏待罪而已

黃州上文路公書

軾再拜孟夏漸熱恭惟留守太尉執事台候方福承以元功正任兵符備物典冊首冠三公雖曾孫之過絕口不言而金滕之書因事自顯真古今之異事聖朝之光華也有自京師來轉示所賜書教一通行草爛然使破甑敝帚復增九鼎之重軾始得罪倉皇出獄死生未分六親不相保然私心所念不暇及也但願平生所存名義至重不知今日所犯爲已見絕於聖賢不得復爲君子乎抑雖有罪不可赦而猶可改也伏念五六日至于旬時終莫能改輒復強顏忍耻飾鄙陋之詞道疇昔之眷以卜於左右遽辱遠答恩禮有加豈非察其無他而恕其不及亦如聖天子所以貸而不殺之意乎伏讀洒然知其不肖之耻未死之間猶可以洗濯磨治復入於道德之場追申徒而謝子產也

軾始就逮赴獄有一子稍長徒步相隨其餘守舍皆婦女幼稚
至宿州御史符下就家取文書州郡望風遣吏蒞卒圍城搜取
老幼幾而死既去婦女恚罵曰是好著書書成何所得而怖我如
此悉取燒之比事定重復尋理亡其七八矣到黃州無所用
心輒復覃思於易論語端居深念若有所得遂因先子之季作
易傳九卷又自以意作論語說五卷窮苦多難壽命不可期恐
此書一旦復淪沒不傳意欲寫數本留人間念新以文字得罪
人必以爲凶衰不祥之書莫肯收藏又自非一代偉人不足託
以必傳者莫若軾之明公而易傳文多未有力裝爲獨致論語
說五卷公退閑暇一爲讀之就使無取亦足見其窮不忘道老
而能學也軾在徐州時見諸郡盜賊爲患而察其人多凶俠不
遜因之以饑饉恐其憂不止於竊攘剽殺也輒草具其事上之
會有旨移湖州而止家所藏書既多亡軾而此書本以爲故轡
糊籠篋獨得不燒籠破見之不覺惘然如夢中事輒錄其本以

獻賦夢遂至此豈敢復言天下事但惜此事相有益於世既不復施行猶欲公知之此則宿昔之心掃除未盡有也公一讀訖即燒之而已黃州食物賤風土稍可安既未得去亦無所歸必老於此拜見無期臨席於邑惟冀以時爲國自重

上昭文富丞相書

續濱先生

轍西蜀之人行年二十有二幸得天子一命之爵飢寒窮困之憂不至於心其身又無一役勞苦之患其所任職不過簿書果鹽之間而且未獲從事以得自盡方其閑居不勝思慮之多不忍自弃以爲天子寬惠與天下無所忌諱而轍不於其強壯閑暇之時有所發明以自致其志而復何事恭惟天子設制策之科以期待天下豪俊魁壘之人是以轍不自量而自處於此蓋天之事自三王以來以至於今世其所論述亦已略備矣而猶有所不釋於心夫古之帝王豈必多才而自爲之爲之有要而居之有道是故以漢高皇帝之恢廓慢易而足以吞項

氏之強漢文皇帝之寬厚長者而足以服天下之衆許何者任人而人爲之用也是以不勞而成功至於武帝材力有餘聰明睿智過於高文然而施之天下時有所折而不遂何者不委之人而自爲用也由此觀之則夫天子之貴亦在任人而已竊惟當今天下之人其所謂有才而可大用者非明公而誰推之公卿之間而最爲有功列之士民之上而最爲有德播之夷狄之域而最爲有勇是三者亦非明公而誰而明公實爲宰相則吾君之所以爲君之事蓋已畢矣古之聖人高拱無爲而望夫百世之後以爲明主賢君者蓋亦如是而可也然而天下之未治則果誰邪下而求之郡縣之吏則曰非我能上而求之朝廷百官則曰非我責明公之立於此也其又將何辭嗟夫蓋亦寧有以秦越人之事說明公者歟昔者秦越人以鹽聞天下天下之人皆以越人爲命越人不在則有病而死者莫不自以爲吾病之非真病而死之非真死也它日有病者爲遇越人而屬之曰

吾捐身以予子子自為子之才治之而無為我治之也越人曰
嗟夫難哉夫子之病雖不至於死而難以愈急治之則傷子之
四支而緩治之則勞苦而不肯去吾非不能去也而畏是二者
夫傷子之四支而後可以除子之病則天下以我為不工而病
之不去則天下以我為非醫此二者所以交戰於吾心而不釋
也既而見其人其人曰夫子則知醫之醫而未知非醫之醫也
今夫非醫之醫者有所冒行而不顧是以能應變於充窮今子
守法密微而用意於方全者則是子猶知醫之醫而已天下之
事急之則變緩之則得而過緩則無及孔子曰道之難行也我
知之矣知者過之不知者不及也夫天下患於不知而又有知
而過之者則是道之果難行也昔者世之賢人患夫世之愛其
爵祿而不忍以其身嘗誠於艱難也故其上之人舊不願身以
搏天下之公利而忘其私在下者亦不敢自愛叫號紛訟以攻
訐其上之短是二者可謂賢於天下之士矣而猶未免為不知

何者不知自安其身之爲安天下之人自重其拔之爲重君子之勢而輕用之於尋常之事則是猶匹夫之亮耳伏自明公執政於今五年天下不聞慷慨激烈之名而日聞敦厚之聲意者明公其知之矣而猶有越人之病也輟讀三國志嘗見曹公與袁紹相持久而不決以問賈詡詡曰公明勝紹勇勝紹用機勝紹紹兵百倍於公公盡地而与之相守半年而紹不得戰則公之勝形已可見矣而久不決意者顧万全之過耳夫事有不同而其意相似今天下之所以仰首而望明公者豈亦比之故哉明公其略思其說當有以解天下之望者不宣輟再拜

代上時相書

廣陵先生

夫天下有三言其上者以道言其次以志言其下以窮言夫以道言者用以有爲者也以志言者不得其有爲者也以窮言者有逢而不自得者也假窮而无逢与有逢而无足想語者皆不言也故不得於道則言志志猶有爲也窮則何所謂耶不得于

身而已。不是故古之昌明之朝。其盛之際。明君在上。賢宰相。振以輔之。故其用人之詳。得士之急。日招延而望來吏。推挽以悉去。故天下之士。無有以志言者。謂其口能輸心。舌以播慮。故在上者。虛耳而側聽。爲下者。披腹以露藏。如是。則天下之士。恨自用之不足。何暇畜以爲志耶。志猶且無言。又況其窮者哉。其無可知已。伏惟昭文相公閣下。昔嘗柄天下。以自任矣。未幾而去。去未幾。而天子思太平。知所由來。則復在相公。則公之所以任于天下者。甚重。而天下之所以待相公而任者。亦不輕也。所宜回唐虞於已歸。赫禹稷於既晦。則將見天下之士。口爲腹竭。而後無以志言。則窮者又可忽耶。嘗聞古者至治之世。民有幼而無父。謂之孤。老而無子。謂之獨。孤獨之民。謂之窮。而無告而無爲者。莫不先之。夫有子而無以爲養。而無何殊有親而無以爲孝。而無何異苟如是。若某者。亦宜仁人之所念也。又况適逢大有爲之時。而家世於門下。復有一日之雅者耶。則今日之

言雖是以窮來而今日之賜亦仁人太有爲閔窮恤故之資也
于言合嚴恐待罪不宜其再拜

上杜相書

南豐先生

某聞夫爲宰相者以已之材爲天下用則爲天下用而不足以
天下之材爲天下用則用天下而有餘古之稱良宰相者不異
焉知此而已矣舜嘗爲宰相者稱其功則曰率八元八凱稱其
德則曰無爲者其舜也欽卒之爲宰相無而舜爲此也則宰相
之弊其亦可知也已或曰舜大聖人也或曰舜遠矣不可尚也
請言近之可言者莫若漢而唐漢之相曰陳平對文帝曰陛下
即問史獄責廷尉問錢穀責治粟內史對周勃曰且陛下問長
安盜賊數又可強對耶問平之所以爲宰相者則曰使卿大夫
各得任其職也觀平之所自任者如此而漢之治莫盛於平爲
相時則其所守者可謂當矣降而至於唐唐之相曰房杜當房
杜之時所爲共事則長孫無忌岑文本王諫諍則鄭公王珣

綱維則戴曹劉相持憲法則張素孫伏伽用兵征戰則李勣李靖長民守土則李亮其餘為卿大夫各任其事馬周溫彥博杜正倫張行成李綱虞世南褚遂良之徒不可勝矣夫諷其君獎正綱維持法憲用兵征伐長民守土皆天下之大務也而盡付之人又与人共宰相之任又有他卿大夫各任其事則旁杜者何為者耶考於其傳不過曰聞人有善若已有之不以求備取人不以己長隔物隨能收叙不捨卑賤而已卒之稱良宰相者必先此二人然則著於近者宰相之弊其亦可知也唐以降天下未嘗無宰相也稱宰相者不過有一二大節可道語而已能以天下之材為天下用真知宰相弊者其誰哉數歲之前閣下為宰相當是時人主方急於致天下之治而當世之士豪傑魁壘者相繼而進雜還於朝雖然邪者惡之庸者忌之亦甚矣獨閤下奮然自信樂海內之善人用於世爭出其力以唱而助之惟恐失其所自立使豪傑者皆若素縣門下以出於是與之佐

人主立州學爲累日之格以勸學者課農桑以損益之數爲吏
陞黜之法重名教以矯褻弊之俗變苟且以起百官衆職之情
革任子之濫明賞罰之信一切欲整齊法度以立天下之式而
庶幾三代之事雖然紛然而疑且排且譏者亦衆矣閣下復毅然
堅金石之斷周旋上下扶持樹植欲使其有成也及不合矣則
引身而退与之俱否嗚呼能以天下之材爲天下用真知宰相
躰者非閣下其誰哉使克其所樹立功德可勝道哉雖其不
克其志豈愧於二帝三代漢唐之爲宰相者哉若某者誠鄙且
賤然嘗從事於書而得聞古聖賢之道每觀今賢傑之士角立
並出与三代漢唐相侔則未嘗不嘆其盛也觀閣下与之反復
議而更張庶事之意知後有聖人作救万世之弊不易此矣則
未嘗不愛其明也觀其不合而散逐消藏則未嘗不恨其道之
難行也以嘆其盛愛其明恨其道之難行之心豈須臾忘其入
哉地之相去也千里世之相後也千載尚慕而欲見之况同其

時過其門牆之下也欤過閣下之門又當閣下釋袂冠而開牀
手名陷利者所趣之曰故敢道其所以然而并書雜文一篇以
爲進拜之資蒙賜之一見烏則其願得矣意賢閣下之心非係
於見否也而復汲汲如是者蓋其欣慕之至而已

上宰相書爲人作

劉編脩

謹再拜上書其官閣下某聞古今之論者曰善爲國者無它使
賢者能有帥職就列而不敢伏斯至治已善爲仕者無它使國
家水均之共事而後出焉斯善士已書曰克明俊德道賢傑之
在位也易泰之象曰上下交而其志通也道上之所以接下也
然是二者有說焉世固不疑賢能之可以興治而謂仕者待上
求與之共事而後出焉不亦越乎夫古今異宜亦豈嘗謂若成
湯之於伊尹魯侯之於周豐而後謂之求之哉彼疎遠窮賤之
士介特自守無望於朝廷而爵命有以及之斯豈非求之效欤
夫識度有高卑智略有廣狹誠使以德事者不奪其職以利用

者不逾其分則山林枯槁之士幸欣欣然繼踵而至矣又況其近者乎伏惟某官閤下以全德靜度寅亮王室謨明輔和清靜緝熙功業日新而無比仁化風動而弥遠賢者在位能者在職可謂至治之極矣某也疎遠窮賤之士也無左右之介未嘗得至子門下仲尼曰邦有道貧且賤焉耻也竊自念勤身苦志從事於幸幸不後於衆人不見弃於朋友僅可與重昏庸昧之倫長甘貧賤之恥乎古人有言曰百發一不中不可謂之善射射未藝也固以全之爲美今雖賢傑群萃而疎遠窮賤有遺而不省者將非百中之美乎伏惟閤下念之傳曰言以足志不言誰知其志虞書曰賦納以言仲尼曰不知言無以知人也誠謂閤下必以言而知人故敢冒進其說焉伏惟閤下亮之莊周之書曰遂使之而觀其忠逆使之而觀其恭煩使之而觀其能卒然問焉而觀其知急病之期而觀其信委之以財而觀其仁古之君子其察人如此之祥也某也不肖惟閤下所以命之于冒尊嚴

去六

上范丞相治躬書

賈節先生

相公之去蜀劍山草木春風兩紀矣江山貴愛之國猶能想記其地乎大江之南榮爲東蜀之陋邦某生於榮挾書山中私有所念以謂自信之士方其慕古人於千載之上擊節而嘆恨不即見之也天生豪傑幸而同時有及見之喜當其彼貴此賤反自疑而不進何也豈非慮其驕不下士尚何得吐肯中之奇耶吾寧卷而懷之有足樂者嗚呼此士自絕之過而貴賤之由是不相通也某竊隘之既而自謂曰公卿必有負道者焉當以道而求道之未至也某當以進之道之儻可致也然後出求當世之賢今乏人傑有如范公者曷往見之此心固有待也雖然卒也幸未及成弗獲伸見賢之拜掃迹劍外聲言之不相聞俯不知其身之微賤而以事迫於外欲奉千里之書輒開肯腹以告可乎某又自謙於公曰言之無害也以平生嚮慕之誠此心已

有許於范公矣。范公固未知之。而吾之心終不可負也。事可緩見而言事不可緩。未見而言其實一也。山林之士既不當言。權貴之門又不敢言。誠以相公直道扶王家。則其言之爲不妄伏。惟明公清燕優閑之際。姑聽其語可乎。其功仰天子明聖。前日以巨僚之章不得已降執事者。一官而未閑之封敕。叩天闕。何其欲去之堅也。切意大君子之心。欲持明哲易退之德。以爲身謀則善矣。然非今日之宜也。伏惟相公異乎疎遠之旨。當與宋同其休戚。偶天子有爲之際。獨不念朝廷乎。殆非初去就之時也。何則。大臣去就系天下之安危。身雖宜保而禍不可以苟免也。君將弃我乎。雖豫爲退藏之計。刻章曰上竟無裨於全身。使天下有平治之意。自知捨我其誰。君始不吾信。固當受黜而不辭。其復然吾言也。仲尼曰。大臣以道事君。不可則止。是仲尼教人使不枉道以強活而不教人遽絕於君也。刻何事黜而言不已。陳蕃屢退而不忍去者。彼豈苟然而已哉。公天下

皆曰吾君不忘吾范公銳然獨斷不惑群議殆將復用之也神聖有爲方求適治之路而吾范公救蔡丞相確辯蘇尚書中立不倚之誠確乎不拔如立千尺之表揭善惡之岷天子信焉姑使偃息近鎮復將聽其言而判異議之疑也而吾范公之心亦知天子之明聖可與至堯舜之域可與邁成康之軌可與辨君子而察小人可與休國而益民相有待而然也天下之人同爲此言者何也彼其傾耳而聽虛心而俟者亦知聖意之未忘不欲相公自絕於君故也相公偶此之際遽然求去豈所以系朝廷蒼生之望乎噫是何求去之速也姑少留于侯藩察聖意之終始假之數年然後勇退寧爲晚耶某能言之惟大賢則能聽之苟以爲狂爲愚而弗從之復將誦文正公之遺烈以告子下執事夫書其父以悅其子必求其聽己又將以爲謫乎亦非某之忍爲也某聞長者道盛德之言曰吾當先天下之憂而憂使文正公獲當今日則愛君爲國之心其愛宜如之何也誦其言

思其人而不得見則將議其勲以攷其行己之大方切以謂文
正公過唐裴度遠矣當度之時天下望之爲軒重而文宗亦未
辨牛李之是非惟念度之不裴也而其晚節之計皆出於自安
無經濟意使時君復誰望耶文正公則不然始方貶黜而明黨
之論遂起其後稍徙潤州時造謗者復在以事上亟命置之嶺
南當時之士凜然寒心矣自非我公不敢自絕於君何能悟主
主如此使今日之盛聖子神孫益隆太平者皆賴仁祖聖明速
回日月之光深照忠義之賜也今主上聖德日躋慨然願治相
公於斯時其憂國之心當任文正公之責而後可也主上恩禮
兼隆可謂至矣相公自視孰尚仁宗之於文正乎是知往日君
臣之間猶踈於今也文正以孤生進不敢忘君如彼相公以壯
德承大恩乞身堅去如此是豈有識之士所望於門下之意耶
伏惟相公嘿思而俯詒焉無以一己之心爲進退而以天下之
心爲進退聖君難逢勉濟大業不宣

再上范丞相論事書

司前

去年相公鎮賴昌時有蜀布衣万里獻書者即某也其間言喪
度晚計浮沉有愧文正公終始之節仰以勸執事者無遽求去
如文正不敢忘君焉方虞鄙賤之書獲玷耳目之罪可只部吏
傳諫草見相公奮言呂丞相等非獨慶明天子之有忠臣相公
父子方其公議遠過裴度一等抑又喜某之言似有合於大君
子之心姑竊聽其說也天下幸甚雖然天下之論竊亦有所議
曰我天子方其即位之初起執事以政而執事落落元祐間未
必合也今日之章何苦自陷於黨人耶又曰論者議元祐之政
非是則執事而謂公一弊之人也今日之章何強聒以自明耶
某再拜回避謹昌言而告之曰聖天子在上臣下盡忠報國誰
黃爲朋黨無相公知事君報國亦不知所以爲朋黨是二說皆非
也某嘗觀歐公永叔言杜韓富三公子者於文正公同心之人
也爲國議事未必相從公言不私至於廷諍平居暇日則更相

稱譽不暇彼無心於朋黨也為明天子故也尹公師魯於文正公師友也方其上書自陳力乞同貳時亦豈有心於朋黨也為明天子故也切意相公自處於中固亦如是誠於事主豈嘗用意於其間哉是二說者皆妄人耳伏惟相公執德不回無所偏附今日之章不特破議者之疑某抑又為吾君賀也何必言之相公雅意本朝豈特為諸公而設耶將以立公議而為法和朝廷而為人謀之印賀者此也獨不見蕭規曹隨之事乎蕭必舉曹而曹不變蕭之法殆非更為彼我者也熙寧元祐之法度均法度也朝廷方以繼志為孝隨時因革審其是而已人惟無心則信手所取無適而不快切意相公立公議而為法殆為此也又不見牛李之事乎縉紳之禍四十餘年而不解非朝廷禍也元豐元祐之人均臣子也別而用之辨其邪正而已天下未嘗無才求之惟恐不及用之惟恐不盡別為兩黨十取其五豈不惜哉天下固有端方敢言之士然量而後入者事君之義也苟

非天子渙然水釋示以不疑則安能自竭乎切意相公和朝廷
而爲人怨爲此也相公以中和之德行正直之言我天子如天
地日月兼容而溥照之行將信執事之言孟子曰責難於君謂
之恭陳善閉邪謂之敬謂吾君不能謂之賊敢以爲左右獻相
望方里恨不即見君子愛德之至感激不能盡言不宣

國朝二百家名賢文粹卷第十一

新刊 國朝一百家名賢文粹卷第八十二

書

上宰相書目五

上富相公書

李直講

至和二年八月十七日將仕郎試太學助教李觀謹西望拜
奉書集賢相公閣下鄉者相公偃息于外十有一年天下之士
憤懣者無所吐天下之民窮苦者無所愬宗廟有神社稷有靈
祐啓聖心廓然日出擯讒說於天地之底登舊德於赤天之上
含氣之類孰不相慶千万幸甚千万幸甚議者曰賢入當位矣
恢儒復古此其時矣觀以爲不然周公相成王必先有討於管
蔡商奄而後制禮作樂孔子爲魯司寇亦且殺少正卯會夾谷
以懼齊侯取汶陽田未聞區區以文字爲先何哉緩急之節然
也今之大患患在夷狄士大夫之耳目屬于相公久矣謂排難
解紛不在他人于如斯位如斯籌深策遠蓋非小子所能窺也

若夫禍以忽而生勢以激而動亦不可知朝廷憂西北而不憂東南無寇賊之備是所謂忽也用力於西北則勢不救東南生燕犇之心是所謂激也竊恐燕趙有舉烽之變則荆揚燕安堵之民其曰無備者非兵非食官不得人之謂也今之取才既不盡善而南國卑薄隔以江湖朝士所不欲求比於四方最爲少人近者懷智高之亂足以觀之矣智高之起於邕也非若鬼神出自恍惚蓋有萌漸可見人或言之而主者如不聞及其至於廢也非有羽翼降自空虛蓋已旬月之行衆欲距之而主者閉門之不暇遂使百越之地千里無煙積尸成山流血成川非它也官不得人之蔽也凡今任官貴在科名狃橫南郡守不知幾人非但無功又不能死唯趙師旦曹觀以節義自顯夫二人者皆無出身孔宗且以負謗之故謫掾于邕事未起而言言不用而死夫又豈有科名哉凡今用法小過不宥而大刑不行小過不宥故跡弛者廢大刑不行故自寬者安橫南之吏或不備不虞

或偷生惜死而不聞有伏鈇鎖者以不忍之政馭無恥之人如
乘鶩船而含鞭策欲其致遠何可得哉所幸智高堅子本無遠
略如使匹馬尺鐵踰嶺而北則江表生靈已魚肉矣當是時數
千百里之中無一人可與計事者或云修城池或云教士卒祇
以行破公文何曾得似兒戲令人見之不覺大笑賊若能來誰
有今日相公非常之人固不爲常人之事見幾而作今也其時
若謂才之難得道在馴致則凡守大藩如古方伯運帥者且宜
順東海十數郡得一俊傑以臨制之亦足以有爲矣如此雖大
駕登單于臺元帥勤燕然山無南顧之憂矣况當平世誰敢動
哉觀慶曆四年嘗以書言南方事必達左右矣後二年作長江
賦欲干櫓室之聽而無路以通謹錄一本塵玷台座草茅之愚
行年四十矣矣一事不成百病俱發未知餘年有幾唯未死間
不逢亂賊是所願也故復咄咄上讀威尊伏惟哀其狂而寬其
罪不宣觀恐懼再拜

上富丞相書

去際先生

某皇恐啓伏自明公以上公還第終未獲一侍几杖每聞東來人頗談燕間輔養之樂不交世務惟野夫山叟相与之遊其聞而疑之尚意傳者有所未識雖然所見平外者固足以起有識之論矣某聞古者三公無職事惟有德者居之內則論道于朝外則主教于鄉自天子至于鄉之孝士皆從而孝故謂之鄉老亦謂之天子之老老則成德更事之稱也古之大人當是任者必將以斯道覺斯人成已以成物豈以爵位進退解力盛衰爲之變哉惟公道問孝守中庸以道致君中立不倚去就之際有古大目之風雖功成身退不在其位然爵德與齒三者脩享正論正行一倡于家則朝廷四方將不遠千里而應利勢如是可無意乎筋力齒髮固有消長至于心術德慮老當益壯未容而形俱衰今大道未明人趨異孝不入于莊則入于釋疑聖人爲未盡輕禮義爲不足孝以苟安偷情爲德性不知養民教民爲

先務致人倫不明万物憔悴此老成大人惻隱存心之時以道
自任動為世法正國大經振起敝俗使人人皆被其澤在公之
力宜无難矣配義與道以養吾氣心實壯壯安身利用將与天
地始終其緒餘之獲亦足以全吾身之壽考若夫移精变氣務求
年長此山谷辟世之士獨善其身者之所好豈世之所以望於
公者哉某早厚厚遇不敢不強道不圻進私竊自謂欲為知己
者報直不過此未識公意以為何如狂身無取尚異聞納不勝
下情怛惻之望不宣

上司馬溫公書

前溪先生

比者得奉鈞誨使得遂掃塵之勤以窺麟虎進退之儀而精神
蕩搖榮懼交至蓋自謝客始於相門而四方士大夫之遊京師
而欲竊望顏色者往往延頸於車馬之紛埃而順風之呼曰為
曠聞親炙之論不過寒暄而溫何人乃敢幸此自惟先府嘗有
目止游之雅而德度深厚不貳其孤樹刻解駿風物如在感

涕俱下義然知歸河晉謂古之人其能神能聖采有如周公孔子之盛者哉周公則以見於人爲盛孔子則以不見之爲盛何者其窮達重勢故也蓋達斯爲相窮斯爲師此窮達之極乎命而可以出處貴賤敵者也周公相天子任天下方是時匹夫下士自以不往見之爲重然周公常以千鈞借之此何損於太虛之一塵而孔子蒞迹詩書不患人之不已知也來者不拒去者不追而已相公有孔子道術而無其窮無周公之憂患而有其位此以見於人爲盛之一時也然其見亦多類矣得於面目之間而不得其情則不爲善見者故古人有一見之間而形神釋然各得其所相忘此果何道哉大匠入山林而廣廈之材盡蓋匠手有深於一顧者要不在目睫也涇顛躓於世久矣安有居太山之下滄海之濱而長養游泳乃得同草木魚鱉之族其舍生者哉十年四方千態萬狀相公憐其舊物之久弃不收賜之以見矣詩不云乎既見君子我心則夷然則使涇之至於能夷者

此可以意得可以言致哉

上宰相書

同前

竊聞漢有卒以一介万死取尺寸之功於鋒鏑間異以于利常
負得氣方是時值賢將軍已富貴不居功名淡然若虛是卒泯
泯竟無以發明沒首奔走以老凡有戰伐者皆因之謝去愴肝
腦荆棘之地涕零不自勝晉有士父幽蓬華步不出戶限雖一
咳唾聲若畏鄰知其質金玉如處子而家甚豪兒女僕妾皆有
飢色挾所奇將仕方是時值賢相國已富貴口不言錢惡人以
祿累外斗事上聞而區區之望邈若霄漢是士亦無与之借齒
牙可以撼動聲勢者然失所貧賤凡有奇貨欲出為市則日常
遇彥其可憐如此夫功名大人顧一介士卒歲月心力之所積
致也既富貴矣不暇及瑣瑣此非離世異俗松上策矣特持以
九州四海英雄之拒馬城壘而已果何意哉漢不及三代晉不
及兩漢切要謂以此正不即料理士卒報也豈羈紲老大度時

以過人甚明白乃若脫綽死久困若不敢勺水於行道以救焦渴則大略曾不減前士卒所聞真者庶幾於大入者出以身試之閣下兼直將相事業輔聖敬天子躋一世於承平不以已富貴而屈身色笑与士大夫同所欲有趨左右敢自獻功者如竹頭木屑等輩不知幾何人矣閣下能自處曰漢不乏韓彭顧以已格人非真將軍事挾奇倖進如承蜩累丸等輩不知幾何人矣閣下能自處曰晉不乏王謝顧以已格人非真將軍事其闊達踈通何其卓卓也嗚呼行酒執炙德澤先乎其間則倉卒風雲豈吾臂指也奈何尚有賢愚同滯感時愛日之嘆乎夫玉與石焚則俱燼而已布帛麻縷同則價相若也天下人材之出不爲少差閣下加釐折之力鼓其倦而進焉使各得以及時其未死尚可以鼓清風之作離莠穉躋思皇利見之頌以先朱草景星之應爲閣下盛事未敢自陋也

上司馬丞相論十科是非書

同前

涇前日聞朝廷張十科之法敬讀者自過安竊有嘆焉何者蓋
貴有權富有財而後能榮辱人能升沉人能生死人而入亦以
此奔走之故權分則坐席冷財分則大馬无色且奎賢有上此
宰相富路之權也今執事官自諫議寄祿官自太中大夫皆從
官自待制而上一切分其權以爲之便各獻其所知則刻心掃
迹付公器於十手之共可謂落落有大弊矣古者上自公府下
至諸侯王牧守凡僚屬皆得自辟除以從則相尚於相志非有
濫予之間也而况姑獻其所知以待上之用也哉其間細識淺
度亦以奎賢用士之權爲已怙使護惜畏忌不忍爲人而區區
僅得於耳目之好掌握之私而已今十科之法將收盡於群力
苟人人向公而待之以久則亦豈小補哉雖然頗有所未喻者
其法所謂上循資序則官非其人何以致治无乃違資格拘滯
不足以傳天下之才而且兆意於此耶至於監司科則必率知
州資序以止人充之又何謂也且內之爲省郎外之爲監司其

實爲多其所擢用爲急且高選也異時嘗有以監當人充省郎者既而以祿薄不足養自是格不用知縣資序此特爲常調者設亦令一切用通判資序以上人充其選則是雖庸人常調而有資序者皆可幸進雖常歷任使而非資序者終不可以擢用也如以謂祿薄不足養則今蓋有朝奉朝請郎而其資序猶爲知縣者則祿薄不足養何可緊也如以謂絕塵躡等校之使指則往往少成疾到不能無輕重駿馬顛仆之失是矯枉過正知其一而不知其二也不遴其人而徒齟齬以資考歲月之爛則非特爲予者之厄而雖廟堂之上造物之際亦豈能運心手於無滯哉漢方雄以限年取孝廉唐裴光庭以資考爲銓品此兩人者其爲拘鑿滯泥亦無以相遠也而光庭特以妄謬取譏於一時而雖死且不得佳諡而方雄之賢則附此益顯蓋雄雖以限年爲法而至於奇才異行則不拘年齒故廣陵徐淑年未及舉則一問而譴罷謝康趙建則皆不失爲童子郎且限年四

雖以熟養德器而議者已病其太拘然救之以不拘年齒則猶之經有權兵有奇也按一定之法而無少出入於其間則才者困於資薄而不才者駕積累以平遽豈真所以扶公論哉今左右司尚書諫館閣等官未嘗以資格問也而獨施於省郎監司是省郎監司必陳人而後可爲也夫用資格廢資格皆僞法而已在高位者苟有人焉則或縱或捨將一出於宵中而法豈足膠乎然不用資格其失小用資格其失大蓋委曲附會多方以就於法其失小也宰相用其才於上而執法者繩之於下其失大也崔祐甫爲相未幾年除吏八百人以資格繩之則百九千穿何適而不爲過乎吏部主選事凡若干資序入其格若干勞績入其格銖銖較之於此焉可也省郎監司非吏部之所得專也廟堂之上造物之際苟不權不奇無出入以神運動之手則是乃有司之事尔顧何以籠天下之士夫乎十科之法凡無官人得舉者四科則其病資格之弊而爲此不膠至矣至於省郎

監司猶介介於資序是返不若布衣無官之人也豈不倒置哉
比日有官爲轉運提刑而適以通判資序入爲員外郎者有若
於常調知州通判而偶以資序擢爲監司者亦足以見資格之
困於弥縫也夫爲獲夢員爲實斯可也苟度天下之足而就獲
則終歲無一合者矣舜率十六相非資格法也文王用多士非
資格法也安有張十科之法以疎闊待天下之豪雋而尚守資
格於內之省郎外之監司誠所未喻焉天下之先務其急莫如
用才矣莫如用勞人之才蓋有事功可見者事功之區區雖不
足爲言而其人之才否可以類觸也然則資格之法果安用哉
譬如蛇虺蝟甲均腐朽於万物之塵壤而後已曾何足以汚陶
冶之間乎閣下爲宰相爲四方所仰望於廟堂諸公同爲聲氣
宜非愛於一言者時不可失才不易得太平不難致奈何居造
化之北謹窮臭之法自轉轉於一方也哉苟惟推此以性則凡
運動之手蓋有與天俱行者非特如上所言省郎監司而已若

曰十科文具法亦非愚所敢知也

上文潞公獻所著詩書

宛丘先生

古之言詩者以謂動天地感鬼神莫近於詩夫詩之興出於人之情喜怒哀樂之際皆一人之私言而至大之天地極幽之鬼神而詩乃能感動之者何也蓋天地雖大鬼神雖幽而惟至誠能動之彼詩者雖一人之私意而要之必發於誠而後作故人之於詩不感於物不動於情而作者蓋寡矣今天世之人有順於其心而後樂有逆於其欲而後怨當樂而反悲當怨而反愛者世之所未嘗有而樂而怨者一有使之莫知其然而然者也豈非至誠之動也哉彼詩者宣所樂所怨之文也夫情動於中而無爲詩其道情而不苟則其能動天地感鬼神者是至誠之悅也文章蓄其變多矣惟詩獨近於誠故欲觀人者莫如詩故古之君子相與燕樂醕酢之際必賦詩以觀賓主之意雖不必作於其人而必取古人之詩以見其志故先王之時大至於朝廷

之政事廣至於四方之風俗微至於匹夫賤士之悲嗟婦人女
子之幽怨一考於詩而知之而使有司以時未取而藏諸太師
又播之樂章大者薦之郊廟而次者陳之燕享則夫詩之可以
觀政察物其重蓋如此自周衰以來後世作者紛然並出以至
於今數千年其間變制異技奇言詭述不可勝記其間卓然可稱
者不過數人其餘紛紛籍籍皆不足道而違情拂志之作往往
或有非如古之於詩必出於誠意而不誣也然違情拂志者蓋
有之矣至於顯情之真發志之實者尚十九也其不肖自初至
今頗考歷世之爲詩者上自風雅之興而中觀騷人之作下考
蘇李以來至於唐掃除蕃穢而撫其真刊落蔓衍而食其實頗
有得於前人而時時心之所感發亦竊見之於詩句夫人之生
於天地之間目之所見耳之所聞心之所思一日之間無頃刻
之休而又觀夫四時之動敷華發秀於春成材布實於夏淒風
冷露鳴虫隕桑而秋興重雲積雪大寒飛霰而冬至則一歲之

間無一日隙以人之無情對物之無定候則感觸交戰旦夜相召而欲望其不發于文字言語以消去其情蓋不可得也則又知詩者雖欲不爲有所不能

上丞相王荊公書

徐中丞德占

昔者聖賢相逢而其妙用之事業足以善天下傳後世者而其德配天地而非其時不得載之行事以成位乎其中者而夫有至誠肯聽之君而行政之專在位之久而功烈止於如此者是皆相公平昔之所明擇而安居安居而誠樂誠樂而兩忘焉而後以得於今日之天也某雖讀之不足以爲知言某雖試之不足以增高論是皆無可爲相公而有言也明王之迹既遠而屢更亂世所謂千百年絕道之後而乃有聖君卓然興起於此時視其勢且非小小之作而所謂善天下傳後世者固將日計進而月計功勞羅廣搜以及昆蟲草木之靈智皆可以盡其才用而不弃况於能者之力而智者之知哉某之自揣自幸又誠不

負於此時此士達而陪後列之談則足以增竹帛之榮窮而終
山林之樂則足以爲易俗之倡其窮其達皆自遂如此是又無
可以爲其而自有言者也疊兩先所可言而其之今日不能以
默然特見士大夫之議論而夫奉法長民者之所爲其未足以
識聖主賢相之意而易此時之光陰者甚多而竊有傷焉誠恐
法之未孚吏之未虔民之未明而已移可愛之日車於義和也
夫兩人之此時者天也愛日趨功而成就之或小或大皆不可
委之天而正人之所爲者也人之所爲不勉不至故某近探所
聞而著爲狂妄之說輒欲干聖主之聽而身賤言遠先因自進
以爲當今道德之表自任以天下之重而急欲聞此者惟相公
其人謹因舍弟應舉夫府繕寫所云之書凡兩本四策而附以
獻于相公之左右政事之際試數而讀之果爲可用幸賜一言
之澤進諸天子之前以當太平獨覽之語雖其中未必有所補
於聖朝之聰明而其惓惓之心必如此而後足耳夫以匹夫之

微而坐通宰相之書爲罪一也山貶之賤而敢議國家之政事
爲罪二也意不足以主文而文不足以明意爲罪三也相公以爲
可觀則某之志已在三罪之外矣以爲無所觀則又安所逃焉

上文太師干求舉賢良書

馮左丞

某前歲不度愚賤三見想公許伏蒙相公重賜顧接此古人以
貴下賤擇髮吐哺之義而每言於人無有信者何者相公位貌之
尊功業之隆而某一介鄙士也何所取者而使相公三見而不倦
哉雖然某未知某之所負而相公之所取某也士之所負必曰行
義高世文章驚人某愚不能此然量所負非特此二者以見相公
也培塿之高汚潢之深懦夫孺子皆能奔逐其上而游泳其中至
於登万仞之崖臨不測之淵仰觀俯窺而不眩安行危坐而不漂
則其氣之所守蓋有過人者尋常之士相與謀於鄉黨朋友之間
而出見州縣之吏皆能閉視傲睨高談偉語慷慨不顧及一親王
公夫人則勢脅於外而氣奪於中駭憾戰慄不知所措其勢然也

恭惟相公貴窮乎公相威振於天下出殿近輔達官願仕交出於境遠邇而不敢入謁某也遠方下國之人後進之微小官之賤無一日之故先容之藉率然而前進退拱揖不失常度語言應對無一差錯夫見相公而不懼天下其誰懼者天下所不能懼則天下之事其有不可為者此皆某之所負而相公之所取而人之所以不知而不信也幸甚幸甚今者願有告於相公願垂聽錄使其得終見其所負相公亦將有取焉某生無他長幼知讀書既長隨流輩學時文以外計之祿再上得官本非所好以為士之幸要適天下之用故前古廢與治亂之變而當世利害得失之言竊嘗究其略矣則又以士之顯名於後世不若見用於當時王符仲長統開門著書設切時政積千萬言其功至矣然不若主父嚴徐之徒上一書達一議奮書於朝暮之為快方先帝銳意太平抽擢英雋之時而某尚幼方走場屋未暇當時之務今天下無事百官守成雖汲昂臨帶自致於明時而尚何所因者切自嗟惜此者幸逢天子以

制策取天下之士區區之愚妄以求奮於此且士孰不學而某幸有志於當世之務士或能有志於當世之務而某幸天子以制策取天下之士天下之士孰無心於制策之榮然天子使兩制大目舉其所知兩制大目天下之士識者無幾而某又幸嘗三見相公天其或者果有意於某欤何其幸之多也昔張說為相而張九齡房琯皆出其門當時之士以爲千載之下不可復得今河陽李寶政亦見於故忠獻韓公之門縉紳皆嗟以爲是繼張房之迹相公位貌德業誠已比侔於忠獻矣而某之愚何敢望於河陽然使相公之門如某輩猶不弃則若河陽者接跡而至矣如此則豈獨爲某謀哉擬進策諭二十首隨書上獻伏希下勅筆略賜聽覽以爲可取繼以進無任皇恐依歸之至

上吳相公書

濟北先生

天下之士見相公而言利害者幾人言而當者幾人言而不當者幾人若是者某舉不能知徒見相公之用人內舉不避親外

舉不避讎近取不避貴遠取不問賤大人之學儒墨之英大有
所必用牛角之歌堂下之言小有所不遺以是知相公所持者
甚重所期者甚遠而昔者或末之識也昔太祖皇帝不馳一馬
不折一矢而有天下天下稽顙而稱臣五國委命而下吏可謂
聰明睿智神武不殺夫太宗修文訓武以培其基真宗隆政講
事以潤其色仁宗陶之以仁表之以孝四十二年天下以安無
狗吠之警康平英宗禮樂宜備而諫譟未遑也今天子慨然發
憤追惟祖宗之餘英想見三代之盛事於是舉國政而屬之相
公相公以天子之意甚信而不疑也故取以一身而獨任天下
之責思天下之民有不與知天子之意者若已之塗其耳使不
得聞聞其自使不得見也故夜以繼日坐以待旦以急天下之
務一沐三握髮一飯三吐哺以待天下之賢非堯舜禹湯文武
周公之所常行不以告吾君化吾民使一日爲也雖然三帝三
王之道不行於世久矣儀秦以口舌事天下而忠厚之俗離孫

吳以兵法駐齊民而機奪之驟起并田壞於軌而天下方因于
兼并肉刑變於文而強梁始輕於犯法尋經捕傳得不償云而
兩京之學衰更爲虛無不貴實効而東晉之治失陵夷以至宋
齊梁隋文教旣衰武德不輝而天下瓜分矣神堯以英略一天
下而太宗明皇繼之宜若小治也然猶府衛之兵廢而爲驍騎
世業之田壞而爲兼并租庸調之法變而爲兩稅而唐之民卒
不獲禮之盛者豈天未欲平治天下邪下逮五季王政不綱民
德日薄固無可議者蓋又百年有餘矣天下之民引頸企踵刻
月計日以求見太平之成法者固在於斯時相公謂不大有爲
以創其意則天下不治故先之以號令以齊其心次之以農桑
以贍其力次之以刑罰以督其經猶以爲未也則建學官以養
其材崇科舉以變其習昔之所缺今或有之非以爲獨也凡以
使天下不敢議不可知不敢議則治無不至化無不神矣此相
公所以上不負天子下不負萬民之心天子亦以是深信而無

幾方民亦以此有望於樂成也自昔帝主之臣非有極高明致
廣大之學其誰敢自任天下之重如此者孔子之治魯誅少正
卯而齊人以爲憂孟子之相齊言必稱堯舜而溥子斃以爲感
然則非常之事固常情之所懼者南冥之鵬海擊於千里而斤
鷁從後而笑之多見其不知量也某東方之鄙人幸不足以立
本才不足以超時獨以謂相公之用人雖撲擻楓棘莫不各當
其分相公之待物雖鳥獸虫魚莫不使之各盡其欲凡天之所
生凡地之所養無一物不得自遂者是以敢用繆悠之說進焉
雖然豈敢爲囊中之穎邪亦相公至仁樂育使不至於無用失
性而已孔子曰邦有道貧且賤焉耻也孟子曰人不可無耻某
之懷耻有道之世久矣而相公之治常以一物不得自遂爲憂
則某之耻有望乎已也伏惟相公神明亮焉身賤迹外輒敢自
納於不測之誅不勝戰慄

月日高郵進士秦某謹再拜獻書僕射相公閣下某淮海一介之士行能無所比汲汲焉惟犬馬之養是營釜鍾之祿是干行年三十有七矣而脂韋汨沒德義不加充問學不加進所謂無以自別於常人者豈敢僥倖万一求知於搢紳先生之門哉比者先人之友喬君執中奉使吳越道過淮南具言嘗辱相公齒及名氏屬喬君喻意使進子門下夫布衣之賤見知於宰相此古人所以書巫上且掃門而求者也顧某之不肖何足以辱此幸甚幸甚雖然某嘗聞之禍莫大於蔽賢福莫長於薦士漢武之大臣其功莫如衛霍其酷莫如張湯青去病之後侯失國除其傳不過一再而湯子孫茆土相襲逮乎東京何哉一身之功過不足以易天下之利害故青去病受蔽賢之禍而湯享薦士之福也雖得二子自古之人其孰不然周公曰我一沐三握髮一針三吐哺起以待士猶恐失天下之賢人蓋其封於少昊之墟曲阜廟食者三十有四世其別封者又有凡蔣邢茅胙祭之

國夫周公之求賢豈有意於求福哉天之報施自富然亦伏惟
相公輔先帝以來陰陽調和庶政具舉吏民効職吏以實其
度數聲明文物之盛粲然而唐虞同風逮承頤命立今天子宗
社至計定於從容事已缺然若無所預其功德可謂蓋百辟而
通神明矣當此之時雖持尊養嚴而却客疎士固於盛致未始
太損然猶孜孜諏訪要於至誠如某之不肖尚挂左右之餘論
况於盛德尊行魁竒俊偉之才乎誠能推所以厚賜不肖之意
思天下尚有所謂盛德尊行魁竒俊偉之才抱能而不試已用
而未顯者兼收而並薦之使朝野內外才性各當其分无一人
失其所者則相公雖不求福而夫天之所以報王氏者亦當不下
於周公矣輒以所爲詩文一卷待命於下執事惟相公察焉

新刊

國朝一百家名賢文粹卷第十二

新刊國朝一百家名賢文粹卷第八十三

書

上宰相書六

上蔡司空書

魯國先生

司空相公閣下十五年前呂丞相用事當此之時其布衣為諸生呂丞相罷章丞相用事當此之時其為利州治獄掾章丞相罷韓丞相用事當此之時其為閬中令韓丞相罷曾丞相用事當此之時其為督郵曾丞相罷而閣下當軸其自常調家朝廷記錄脫之於刀筆之間而處之於師儒之任自念往時閣下鎮蜀其遊太學閣下還朝而其已歸蜀一迹不涉於門館一字不通於几格流落西南四千里外平生交友皆不在要路不知誰薦而得聞於左右也當此之時其感恩為如何而其喜豈易塞哉昨自到任以來日夜通勉職事庶幾有以補報萬一而才調學術止於如此所作講義率皆敷演前輩舊說無一言一句能

自立門戶亦嘗推究李校利病意欲有所建明而勅令格式周
悉備具乃至無有毫髮未全可以藉口獨有一事今試言之閤
下如意爲邇來士大夫崇尚經術以義理相高而忽略文章
不以為意夫崇尚經術是矣文章於道有離有合不可一槩忽
也前世韓退之柳子厚近世歐陽永叔尹師魯王深父輩皆有
文在人間其詞何嘗不合於經其旨何嘗不入於道行之於世
豈得無補而可以忽略都不加意乎竊觀閣下輔政既以經術
取士又使習律習射而鑒箚書畫悉皆置博士此其用意豈獨
遺文章乎而自頃以來小道幾廢場屋之間人自為体立意造
語無復法度詔有司取士以古文為法所謂古文雖不用偶
儷而散語之中暗有聲調其步驟馳騁亦皆有節奏非但如今
日苟然而已今士大夫間亦有知此道者而時所不尚皆相乎
道去不能自見於世臣稍稍收聚而進用之使學者知所趣向
不過數年文弊自變使後世論宋朝古文復興自閣下始此亦

閣下之所願也其久不談世事感閣下屢記其姓名敢復一言
或行或否唯閣下裁之

上曾丞相書

忠惠先生

將仕郎程某謹贄書僕射相公閣下某自少讀書至今二十有
餘歲矣獨好觀古謀人策士著論事迹竊言當世之故故嘗以
為人主不可有材而好為人臣不可功高而名重此二者其勢
必有所獨勝且苟其所獨者重則患將聚歸於一而必至夫人
主操天下隨其所欲一幸而成敗立見幸而成功其志驕矜而
不可止不幸李不能得其所求則禍必中於宰相昔漢武帝內
興制度以誇大中國外觀兵四夷逞其無厭之求其材固英傑
絕人而當時宰相在位以十數皆相繼戮沒此其大者傷則小
者亡上者憂則下者辱故人主唯無欲好名也人主苟求欲好
名則宰相必有以當其憂而受其責者矣人臣功高而信於海
內則主易見疑名重而一世之望所歸則小人將乘間而竊入

且既已致身能見於天下一有疑間而爲僂屣及以見笑自詩
書以來鮮能以功名終始何者以其始之易終之難而進取持
守之勢異也故王公多以其身深念而顧畏其後以裴晉公勲
舊而卒中於李逢吉之間近事韓王佐命之臣而黜於多遜當
此時其身且不能謀而何暇及於謀人者哉此皆古人已往之
成迹不待深沈謀度而後可見也是故人主唯寄政於臣下而
守成無欲則其臣可以久大臣去名遠勢而畏衆人之所爭則持
滿而君不忌上下俱欲無爲則無所與間言也今人主方虛心
屈已行寬大仁厚之政而閣下執其政柄天下皆以吾君五帝
之聖淵默而不可測夫深居淵默獨觀於臣下不微見其志慮
所嚮此常人所安爲易事而賢宰相之所以愈恐懼而憂畏者
也今某請誦閣下之功而効愚衷於前夫先帝七年用兵西域
閣下位爲樞府期年關天都虜青棠破龍抄日賸征發謀料敵
變化捷出一卒不再討及先帝升世中外洶洶策於一言之

間退而就位破蕪臣跋扈之謀却帷幄倉卒之變主君既立朝
廷無事不旬日而取宰相此其智名勇功天下莫能角者也詩
曰衮職有闕唯仲山甫補之我儀圖之愛莫助之夫仲山甫唯
有莫助之材天下雖愛而莫能助故當是時無與對也今閣下
當國纔以旬月一時夙望皆委能譏功自以為不及夫先名實
於万人之上使人不畏其愚而畏其智謀人而吾先見疑於人
此固謀者之所忌而危也使閣下優游不爲固已信於宇內而
振乎百出而今者竊意以為猶欲盡天下事所謂下車搏虎其
爲衆喜而爲士則笑者也故莫如推衆人使自爲之爲之必可
成閣下兩利而收其功使其不可然後徐起而乘之衆人所
不能而後見德是上以身託重人主下交驩同列挾君以見信
進不爲過退不爲咎如此而後乃可長也夫明君不可以世求
而賢宰相不可以人得以高世主之君而輔之以傑出之賢相
則夫仁人君子所爲憂之者深而望之者切而欲終始如一謂

其貴於自用而能安受天言者也觀今進言相國者皆以為得
時行道其友欲閣下去功與名其言固已不足聽然竊以為得
時行道幸於一旦謂常人無功者設而非所望於吾相者也進
卷五十一篇貧不能盡錄錄其半云國事者疾惟觀其大略不宣

上時相書

尚方先生一

某聞古之仕者愛日非以時之不再而吾生之有涯耶夫造物
者之報物以無情犯其成形者去若機動而嬰孩老耄居其半
况死生大變躡其後哉得仕之日如朝菌吾何獨不愛乎雖然
此特吾生之日也所可愛者天下之日尔天下之勢嘗若一人
之身自肇造而至終喪其間太平雖三代之盛皆不及百年而
紛紛者特瞬息耳人生之有壯日奚異乎此然則得志於太平
宜為天下愛日也昔成周之太平紹文武之成烈宜無為也然
周公相與經營至於修井田營洛邑迂頑民巡侯甸撫四夷征
不庭服群辟然後作周官備禮樂以成一代之法子孫之可傳

者六百餘年而繼周者百世猶日用焉夫周公之德輔成王其
有爲之日數十年耳而制作如此之備非為天下愛日耶漢之
文帝唐之正觀開元亦成周之時也世之言太平者必誇企於
此而有志之士每太息焉何則方是之時兵寢刑措民富國強
更化繕法以追三代之風績此百世治安之機會而惜乎無有
為之愛日也故文帝不過躬節儉下農桑之詔而已至於賈誼
治安之策則不能用也太宗不過虛已納諫慕三代禮樂空名
而已房杜之所李又不能進也彷徨則久於治安之日而無能
為故漢終以微弱而唐亦大亂是豈知七國之叛養於文帝之
姑息而武帝窮兵之憤發於文帝之仁柔哉若夫飽食逸居孝
弟忠信不修於暇時一呼而從祿山者皆正觀開元之子孫也
夫有為一失於會通及其淪胥後世雖有成帝之仁賢宣宗之
感輿漢唐不復振矣此何異人之得生方其血氣剛銳富貴
之餘視患禍畏禍蔑如也進德修業既不足以及時名教風誼

不積於心思慮智數不足以禦變勢往來流大化與衰俱至憔悴困死方且追恨昔日之悠悠弗及矣嗚呼天下之日良可愛也今之太平在周則成王在漢則文帝在唐則正觀開元之盛時也昔神考敕時幾以觀會通登真儒灼三俊以成天地之能未滋多休而蕩陵於元祐伏惟相公閣下遭變之初大節截截不可搖奪患列義亦上貫日月下動清議今天子追繹元舊思與昭復重光而天心人意默會宸斷生靈動植再造陶鈞千載君臣古難一遇而閣下今再遇矣伏思平昔請謁潘居東群議改阨若無逃於天地之間求為江湖散人不可得望今有為之日其易偶耶然生化復行于茲三年矣去先代之澤未遠而道洽政治不進于成周物阜民富未過于漢唐學校既修而士輕廉耻水旱方至而民轉溝壑官冗而賢愚同滯兵驕而饋餉不繼內迫大河之憂外負夷狄之患賦性含靈莫不傾心於閣下矣夫山東之相山西之將魯衛之君子燕趙之武士楚蜀珍未嘗

不育於世古之取人以有爲蓋不一矣今庠序郡國登進而得者幾人沉於管庫縲紲隱於市井魚鹽而識拔者幾人堂下之言如斷茂異上之故如卻缺而得者幾人是皆未聞卓然有獻於人望者豈宰相之利勢不足以致人耶某竭來京師嘗造閣下之門懼而不敢將命者再矣日之方中冠蓋相望摩肩疊武待次而見者如堵典謁贊名分序而入旅進群揖屏氣未息而恍然趨出矣夫備禮於去來者固已如夢凡拳跼曲折請問於無下者鮮不爲身謀矣使誠有懷世憂國之士欲自達者肯屑言於此乎夫天下有求之欲何窮而有爲之機會不可失恭惟相公思君目再遇之爲難念太平之日爲可愛遭形虛已以來天下之多士示以有爲求助之誠而養其敢言自盡之氣察其所安而報以至公之去取則紛紛者不復瀆其上而門下之謁多君子矣然後收其英華以潤色太平之事業豈特伊旦專美於商周某西南由儒學苦道遠不自振於末路竊一邑以崇儒

固自適矣然念流形於治世者雖丘陵草木皆薦其材實以
敷生成其涵泳聖化行且老矣輒本致義獨貴於万物今治行
將歸去國萬里它日雖欲自達且弗及矣竊自以爲宰相之職
在正君在知人在明義因議相業論三篇以修左右之贊且茅
之爲物薄而君子取之以格上帝以其可以薦誠意也不龜手
之藥賤而楚人得之以封侯以其所用大也雖然某之區區欲
自致而懼弗及非幸於有取者惟閣下矜其耆耆焉

上張丞相書

王臺先生

中書相公閣下竊讀書竊觀古之人挾道術以進爲於當世雖
所遭之變不同而其安危治亂嘗起於君子小人造次進退之
間然自漢以來君子得安其位者嘗少小人得安其位者嘗多
方其乘機投隙二者角力未知勝負此正幾微用智之時而世
之君子方且區區守正道而不知以權術應之是使權分於
小人而卒爲小人所勝未嘗不譏然而歎蓋位者君子行道之具

而權者所以爲利用得其位用其權而道於是乎可行畢意稷契伊傅周召所以相其君而功高當時名顯後世未嘗不出於此而世俗之說乃曰道以位而後行君子固欲得其位矣既得其位而言合則從不合則去道之廢興蓋有命也何必權是大不然且以一身爲繫者不以去就爲之累以天下爲心者必以得行其道爲足以解憂所謂權者非私已以自便枉道以事人者也資之以行其道西漢之際諸呂用事陳平以爲憂陸賈從容言曰將相和調則仕豫附上豫附則天下雖有變而權不分故陳平交歡絳侯以圖諸呂彼呂氏猶以平勃之爲已而不爲劉氏也雖然陳平絳侯皆以社稷爲心者故其權易合使其不幸而又有小人焉則如何君子亦用術以持其權使之不爲小人所勝而已古之聖賢有無其位而不得行其道者固多矣有得其位而權分於小人亦不得行其道者蓋天下不幸君子小人並進君子得君小人亦得君而邪正之相形忠佞之相

間無術以持之則邪与使必勝張九齡陸贄是也方李林甫裴
延齡皆以辯智得幸而二子者務欲以口舌爭之終以不勝二
子之去其於去就之分固無負而欲行道者何賴焉是以一身
爲繫而不以天下爲心者也是無術以持其權者也昔狄仁傑
蒙恥立朝方邪使得志之時一切順適其欲而使之不吾忌陰
進張柬之等以爲腹心小人之權漸去而不自知而張柬之等
卒能有功故後世頌之以仁傑爲多嗚呼不與小人較於邪正
忠佞之間而薦引善類以陰消其權使之不自知者是權以勝
小人之術也恭惟閣下以至大之氣行至正之言自歷臺諫權
待從外政府皆以剛方不合小人而去其身屢折而氣不少衰
頃者大臣竊權以私意賞罰天下力引朋黨相与爲敵欺以或
風俗天子嫉之起閣下於南荒復還政柄用縉紳之公排斥小
之異音而遂倚閣下爲相命下之曰士大夫釋然相慶雖市井
小民曰天野老莫不歡欣鼓舞翹足引領望德澤之下流也

竊謂閣下雖為相而小人未盡去此正權以勝小人之時天以一身為繫而不以云就為累閣下前日行之可也以天下為心而必以得行其道為足以解憂今日所望於閣下者當如此恭惟閣下優游不迫以外釋小人之疑登用賢能以陰消小人之勢磨以歲月之久則天下之權自去而不之竟曠然大變以底於至治此天下之大功也今天下雖名為治乎而財之不豐兵之不強吏之不良皆望於閣下而未獲者閣下其可以已乎某西南之鄙人而州縣之賤吏自崇寧初擢第是時閣下在政府例得拜伏於前蒙以桑梓為憐而獎之未幾閣下流落江湖而賞亦流滯州縣輒不得伸今閣下大用矣賞輒不復自弃敢布腹心惟閣下圖之

上朱丞相論王霸書

黃西蜀之鄙人平生名迹亦似為相公見知者宣和之末并在京師屢得瞻望英度已而世運艱難相公倚乘風雲致位宰輔

安劉氏有平勃之功興周室有申甫之業天下嚮嚮想望太平而賞辭在遠方不能少效尺寸以佐下風卑情東嚮惟有依歸輒有今日利害短見相去万里道路梗塞所遣去人未必能達故不敢具其詳姑陳其略賞聞時可以王而遂王者光武之興是也時未可以王而霸以圖王者吳蜀之割據是也方光武安集河北是時群盜赤眉青犢之屬動以萬數海內散亂民思得君如赤子之仰慈母鄧禹說以收攬英雄務悅民心以復高祖之業光武用之遂定天下蓋知時可以王而遂王也曹公新破袁紹兵威日盛孫權欲送質子周瑜定議以承父兄餘資兼六郡之衆兵精糧多將士足用可以韜勇抗威以待天命而孔明亦曰劉備言曹操難為爭鋒孫權可為援其後赤壁之役協策并力以拒曹公一戰而勝天下鼎分蓋知時未可以王而霸以圖王者也鄧禹雖六敗於赤眉威損於桐邑而中興之功猶為第一周瑜孔明有一不死天下亦未可知愚謂三子易地則

皆然其主霸之略不同有時焉而已今自夷狄稱亂天下左社
主上即位南都轉徙吳越于今八年宗廟社稷未有定止朝廷
庶事率多章創賞逮在西蜀又思不知朝堂大議凡所以去為
者王耶霸耶竊惟祖宗仁恩德澤幾二百年在於人心固結不
忘主上天錫勇智遠邁漢光相公王佐之略在鄧禹上因人之
心再造王業蓋亦不難敵有大小勢有險易賞之愚計竊謂周
瑜孔明之議亦不可忽今跨有吳蜀之地但當先定其規模使
上下一心內外同力以觀天下之興廢不出十年可以得志伏惟
相公留意而思之天下幸甚

與趙丞相書

同前

僕賔相公閣下竊嘗愛唐史善論房杜以謂王魏善諫房杜與
其直英衛善兵房杜濟以文持衆美效之君而已無与焉卒之
天下後世言賢相者稱房杜善華藏諸用也竊觀閣下待人以
誠表裏洞達諫於下士不忌不克當艱難授擢之時收攬豪英

定天下之大業者惟此道為能彼有自矜其長果銳輕設謀夫策士疑而不用則功敗名毀身亦隨之亦閭下之細耳今閭下在位海內之士莫不延頸企首願效其區區惟閭下恢然之度井包含六合奇集智觀變而起則功業可成國耻可雪是天下之幸也竊惟天下有自然之機智者因而乘之故易有功若機之未至也雖氣力足以至而智者不動也勾踐棲於會稽迨及復國苦身焦思志欲報吳蓋七年而求奮范蠡大夫種之徒以為未可又十有餘年吳為黃池之會另一幸而敗吳再幸而亡之其淹淹如此蓋待其機也宣和之末天下又平夷狄之禍一旦而起京師既已不守而四方群盜如蠅毛而奮以塗炭吾民主上嗣位越在南服夷狄新得志金帛子女充足其欲而中國之地彼固不能有也立楚不終復又立齊齊人蓋背北面於我中寔不安而傲睨活肆若真叛者徒憊楚人之禍救死而已執事大人曾不慮此皆習其尊大之勢抵掌抗論平僭偽攘夷狄此聲嘈嘈於四境

天下之禍日深而所謂機者墮於渺冥莫之能見也爲今之計
訓兵蓄銳拊循吾民以待其機此最上策圖下以爲如何

上黃相迂都議

惲先生

去年春寇亟至城下將相大臣皆謀避寇是時惟習下獨以爲
不可於是淵聖不果出而虜乃退至冬虜復來朝廷持戰守之
議是矣然不能踞城外數舍之地列屯寨募重兵亟使虜騎竟
薄城下其城之不堅非守之過特以守者衆也遂使士大夫之
全軀保妻子者以爲虜當與和不當與戰晉昌言曰二聖播遷
皆前日不奔三鎮者之罪也比年以來虜主大夫氣節不高慮
事不熟謂捐三鎮可以弭禍而不知乃所以速禍七國削亦反
不削亦反蘇峻召亦亂不召亦亂則欲割地以弭無厭之虜而
冀胡馬之不來不已疎乎戎獯之禍芽於李邦彥熾於王雲王
於耿南仲父子而成於李擢此有見之士所以齟齬而怒罵也
慶以往年十五日濟河而朝廷以初八日始召百官集議於延

和其非不知胡行如鬼其勢薄矣雖不捐三鎮猶無一也廣廷
大議謂言弄者十八九特不弄者十許人耳朝之執事者乃以
其軌轍不弄之詞利害明白置在諸人之右淵聖是之特賜召
問某之心豈暇計虜之強弱而為之說哉其所以為國家謀當
如此彼計利鈍較焉弱姑曰以紆目前之患則近日賣國乞降
爭為戎首頑舊不臣徽福異姓者皆是也且虜豈真健者哉謂
秦無人故以威劫之耳使有一蘭相如握壁睨柱劫三鎮不可
劫以河為界又不可彼又安能誕二帝之出取宮嬪宗室而北
乎城雖破矣使有一田單者易土為存掘塹而守排巷而戰病
夫可使跳躍以搏虜婦人可使齟齬以用命彼虜雖強又安能
徑入吾城乎兩宮雖出矣使一仲連者不肯帝秦居調護守管
籥者取天子之璽綬援東宮而立之否則擇宗室之賢握兵於
外者而推尊之於遣使告虜人曰敝邑之士大夫死而死耳若
易此敗號於弊邑之憂也願春宮如法章者在內宗藩如代王

者在外非此立也而尚誰立敢以告執事儻執事者不吾誠提
匹夫之手坐黃屋之下則自代邸來者請以兵見矣宗室之立
群蒙倚之非兩國之福也如是則情奪矣彼又安能帝楚乎嗟
夫某屢爲謀國者言而終莫之從也茲事一失今人憤咤今又
復有迂都之議某安得不爲閤下一言乎某竊嘗妄商古今之
勢寇可避都不可迂夫三鎮不可弃三鎮者中都之根本也亦
都不可迂汴都者天下之根本也有中原則割據中原者正統
也割據者霸統也諸葛亮之奇才而不能軋曹操李克用之驍
勇而不能抗朱溫何哉曹魏朱梁先定中原庸蜀晉人特劫劫
然一方之霸者耳何足以當中原之強大乎尉陀謂陸賈曰我
不居中原故至此漢高祖曰吾安能鬱鬱久居此乎是不得中原
之地而王之雖有豁達大度英雄神武之資蓋不足以一天下
而臣之也若金汴都金陵是一舉而擲中原數十州之地摩
厲長驅放羊大獵則山東秦隴京西淮南之生人盡矣使中州

之士如王猛張賓蘇綽之徒謀得行訖衛律李緒之徒致其
死不知或者之議謂金陵可以居乎儻孽虜之計不知出此是
豈不爲四方英雄豪傑之寶乎春秋時楚人大飢群蠻叛之申
息之北門不啓楚人謀徙於板高爲賈曰不可我能往寇亦能
往則將素常以萬騎陣淝水矣拓跋珪蓋常以萬騎絕淮水矣
昔之知天下大計者必先定計於我而英雄寇賊不能劫而奪
之也曩者虜劫三鎮朝廷諸公低首下氣北面膜拜而爲之劫
盡河又轉而劫二帝又轉而劫宮嬪宗室又轉而劫金輿又轉
而劫此蓋計不先定而虜得以劫奪之也使天下忠義憤罵之
聲嘈嘈然滿天下今吾避虜而遷非畏劫而何是使天下忠義
憤罵之聲復嘈嘈於後日乎某竊料今日之勢尚有可爲者詔
大將出朔方詔一大將出河東集士豪會鄉兵酌險易相原野
某關可以控遏某地可以講動某處可以設伏某水可以限隔
列屯而居拒險而守然後朝廷視虜之遠近以爲進退觀兵之

勝負以爲出虜虜來我去虜去我可守有避寇之名無喪地之實歷考昔人避虜而遷都未有能復振者也魏惠王畏秦遷于大梁楚昭王畏吳遷于郢頃襄王畏秦遷于陳考列王畏秦遷于壽春皆移於陵夷潰敗之域唐則不然天寶而下四世避寇未始遷都爲自蹴絕滅之計故雖數遭變亂而不亡使蒙安史之禍而亟遷焉則唐亡久矣又安能至於天禍而後亡哉突厥之難議者欲遷楚鄧而太宗不可吐蕃之逼唐人欲更都而郭子儀不可若是者可謂知天下大計矣惟閣下能定天下大計故區區之私輒爲天下公言之

上呂太尉書

固窮先生

某嘗謂治時不若治法治法不若治人時有慶與法有利害人有賢不肖此三者百王不易之理治亂安危之所由出也然天下無不可爲之時亦无不可行之法而有不可用之人是以古之君子進而撫世觀時變通而審吾所以扶衰救弊之方非法

之難而用人之爲難切觀熙寧之初與滯起廢典章文物大小
備具閣下親與神考左提右挈刻削蠲弊而更新之自是以來
考者爾於私意三十年間一時人物更五六變方紹聖崇寧大
觀時孝士大夫皆幸公之不用海內情之而其私爲閣下慶者
以神考之經制作法遭世難險與時消亡而閣下之慶與用舍
隨之同時謀謨輔弼銷磨及矣閣下獨康寧壽考屹然爲故國
世臣天其意者豈非以閣下被遇先朝固欲與熙寧元豐法度
相爲存亡而留閣下以復起之耶以今之視熙寧元豐人才進
退孰賢孰庸法度綱紀孰張孰弛主威國勢孰強孰弱兵民財
食孰登孰耗起閣下於閑退之中必將賦之以政所以爲此者
也夫以神考之厲精閣下君臣之契與名卿才大夫先後左右
如以石投水然猶排去異議賞罰利害幾成欲毀如此其難而
況疏其尤難者哉某聞之道路小者不可悉而大者好致其一
二爵祿名器人主操柄以來冒忝頗衆高才大器剖城置邑所

以獎王功而今例以恩澤得此一難也外戚之假寵借勢參預帷幄新進羣星翕然歸之此二難也億頭鼠目子不顧分義專務行險以詆毀前輩開然成群勢難與較此三難也財賈民困邊鄙空虛上下公爲欺蔽下之情不得上達此四難也夫此四者時之極致法之至變一朝而益革之則懼吾身之不安而不能以成功坐視而莫之恤則恐其滋蔓而卒至於不可救前年自門下擢廬江何公爲左丞相然廬江公長者也知因時而不
知正法往年自南方召清河張公爲右丞相然清河公勇於救
弊者也能正法而不先於用人故其謂今之世變法弊甚於熙
寧之初一朝天子赫然捐是四難者以付閣下而聽所以爲不
先登進人材植立基本未易極議也恭惟閣下少負英偉奇特
之氣自入仕于今幾六十年練達世變中間榮辱得喪所閱多
矣今也年高德邵心平氣定乃落筆取實之時使之得位必更
工於其初則廣收衆議建置之良基本立矣然後可以有爲此

某區區猷畝之懷所願一登見而一發其憤也昔唐自肅代以後藩鎮盛強小大各擁兵專制莫敢誰何憲宗用贊皇公爲相一日易三十六鎮無敢動者至其子德裕才略智謀無出其右爲英廟所忌流落不遇逮晚節武宗英漸用之出其緒餘期月之間平太原取澤潞異時驕將叛卒指呼顧盼畏懼震怒如召奴隸二李奇略因難乃見而其謂方天下業距事叢時皆得真才如斯人者仁之復何慮哉我國家奕世承平宏規遠摹度越千古以主上之聰明獨斷聖德方以固非兢唐之比而閣下德望規贊皇父子無愧而遭世文明過之天將復興於此則衆建君子而用賢於四難者斯適其時也若某者愚不知分輕犯交淺之義亦惟閣下始終察之而已

上張相公賀克捷書

新安居士

某自頻頻自拜一某官伏審致果復雋全師奏旅凱之旋舍爵策勳上賞龍文階之冠國勢增重於九鼎廟謨果屬於三

朝野歡娛君臣和樂恭惟某官授書黃石而孝友兼脩得蒼青
錢而氣節益耿登建炎石補之天取紹興龍夾之日方中原竟
土未復請身督戰秦隴之間會仇敵輸馬不還敗績哭尸於燕
雲之外四川一陝草木皆知其威名九夷八蠻君長必問其年
紀或者昧遠而見壯士有妨功而害能紛流四國之言嘖滿中
山之篋周公不失其聖雖既破於斧折仲尼無得而踰又何傷
於日月於用捨去就之際應消息盈虛之時雖邪說淫辭塞大
道之行而主聖臣賢爲數天之福千載之遇一德如初回禹迹
於狂瀾之餘揮郢斤於汗顏之後營形勝要害之地沈心精術
微之幾入而謨明弼諧則藉堂之臯陶出而陳師鞠旅則顯允之
方叔盡護諸將共濟多艱輔弼維使不知行李往來共其乏
顧逆齊父子總以一十年之禍敢睥睨乎江都而累金上下濟
之二十方之兵輒跳梁於淮浦我武前定王師有嚴音正運乎
帷幄之中擒縱玩於股掌之上寶璫寶斂寶敵寶籍幸而措者

皆自治之宜如江如漢如隋如翰奏其勇者有莫禦之勢而號
汝頓鼓險而群醜攪魄豪四廬壽出奇而二鷁疎魂一戰而取
遏劉之威鎮棟而大攬狄之烈番異錫圭之寵獨高指猷之能
若濟巨川作楫楨中流之夫譬如平地爲山勉一簣之加以至
盡大公之心開眾正之路以天下而籠天下以衆中而應衆中
察是非毀譽之亂真明賞罰政刑之允當俾大國之必畏移上
帝之居歆于以迎歸二帝而盡晨昏之歡于以還定遺教而出
塗炭之苦有獻元結中興之頌永懷吉父清風之詩然後視富
貴如浮雲脫功名如弊屣奉王母以高舉仿羲皇而遠遊載雲
旗而駕八龍飲沆瀣而餐六氣享千二百歲廣成之壽居上元
六合真人之宮人何慕焉古無右者其罪矣一斥流落九年放
馴鷗浩蕩之波困毀室漂搖之雨如墜溝壑若迷虛空回不堪
憂朝戰飲死聖君念濟河而有同心之舊尚或託憐相公欲持
綬而施舉手之勞初曰疇昔茲其時矣誰曰不然耿耿精忠懇

戀君父老矣無能爲也安敢僥倖以他求哀之其亦命歟止謂保全於晚節黨生還於鄉國圖報於壤泉所得如斯受賜多矣因對揚於穆穆幸略陳其區區願忍涕更以希万一熙春研媚浩氣冲和更請攝調以副瞻詠路遠書啓難通謹具咨目以申賀誠兼希觀相伏覲鈞察不宣某咨目頓首再拜上

與張相公手書

同前

其頓首再拜上某官即日庚暑蘊隆恭惟督我護將之暇神明叶相鈞候万福某初聞車乘爲川陝視師之行聞外不知軍國一時事機唯是憂江淮捍禦誰其當者徐聞改轅運筭江上如此則行闕無虞矣襄陵上流自亦不妨飛檄指揮夫金虜之情僞齒之計富不出相公目中彼已之審機會之從形聲之神勝負之慮必已先物而默運命令諸將使之應權合變無落窺便於交綏進退之際此區區千慮之獻也此來韓劉二將獲捷擒生督府以傳囚放罪送軍中使喚仰服善壽自是遺民獲彼而

懷此中原不勞而服也如聞韓旣勝而又追之此戰勝之所戒
韓乃犯之賴國之威靈相公之忠赤神物護持幸免耳審如所
聞相公緣此遍檄諸將以警戒之否其它如往日側聞議論於
左右者諒無遺策邇覘更願精密今夏雨澤應期田疇可觀已
有豐稔氣象昔講武類禡之詩蓋頌武王能保有殷士克定歌
家以當天意故其詩曰綏方邦婁豐年主上仁孝願治國復境
土相公慨然堅金石不可變之志為衆人所不能為之事冒大
寒暑困行李以為生靈斯足以上當天意矣上天悔禍茲其時
也願相公勇猛精進克順天意以畢中興之業若夫其間已之
所行人之所望更願加意昔仲山甫將王命明若否以中興周
室者不過曰既明且哲以保其身非獨保身而已蓋曰夙夜匪
解以事一人非枉道以苟全其身亦有仁義焉尔相公今日之
仲山甫也某追憶相公去年六月所惠書詞有傍觀側目豈有
機心衆口鑠金是非莫考求全之意使人不忘之語故舉楊仲

山荆一段以成相公之美非有所聞而爲說惟軍事倥偬之餘
竊幸留賢爲相望數千里之遠無從面展筆舌不能盡所欲言
聊寫一二少見金蘭之意而已矣它乞慎暑強飭勉進肉食資
助氣血以惠生靈此天下蒼生之願不宜某頓首再拜上

別幅

同前

某頓首再拜某區區已具布右幅承徧按諸帥大軍隨員整治
俾順人情仰見高明以順推之何往不利今日使當事者人人
如此中興何所患相公平寇之功實不易就大抵忘者畏以修
耳趣召出於蒼黃相公忠赤所致雖委露臺烏能遂退志耶幾
微之來不能盡察此說誠然某願相公加意周防曷謂周防防
其可防不防其所不可防衛武入相于周以禮自防是也若曰
每念至此憂患不堪某謂周公所以仰而思之坐以待旦蓋其
慮患也深相公憂患蓋周公之用心思其艱以圖其易將至焉
願相公加意於用人之際察其所以而用之無使射羿之徒得

以廁間然後盡相公所以事上之道成大患洪休烈死生之際
不足道也今日國勢如綴旒相公忘親為君忘家為國神明扶
護天其或者輔成在公某之忍死林壑拭目以俟之尊夫人以
次且留蜀徐為迎計所以承志也其善其美安問計絡繹鳳毛
壯實靈利大可喜天之報施忠赤也如此賤累諸兒一一辱流
聞荷荷一侍列拜起居別後每相聚甚奉思也獎借之人亦然
蒙寵寄川藥四種賜茶數品皆羈孤夢想不可得之物拜嘉感
刻無窮其頓首再拜